

Hadirmu membelah kebingungan  
sawah ladang menghijau  
mengalihkan pandangan ke bumbung letronik  
serba canggih mega bulb teknologi terkini  
tersergam mempersiapkan diri mancanegara  
menjulung nama tanah leluhur kebanggaan kami

dekad peradaban membumbung seluruhnya  
di pintu kesaksian keperkasaan terlunjuk kepimpinanmu  
Tunku Abdul Rahman Bapa Kemerdekaan  
Tun Abdul Razak Bapa Pembangunan  
Tun Hussein Onn Bapa Perpaduan dan Keharmonian Rakyat  
seluruhnya telah kau rentangkan  
menjadi satu kebulatan  
membangun rupa bangsa dan negara  
setelah kau lonjatkan Jalur Gemilang  
memuncak tertinggi di paksi keberadaanya

Dataran Merdeka memberangkatkan bibit kemuliaan  
ke persada Bersih Cekap Amanah dan Koridor Raya Multimedia  
seterusnya kau sempurnakan  
bahawa perang tidak semestinya menggunakan senjata  
kelembutan dan kebijaksanaan  
mampu menjinakkan harimau yang garang

dari sebuah nama yang tak berkekuatan apa-apa  
wajah Mahathirmu dan Jalur Gemilang  
meletakkan harga kedaulatan serta keberadaan kami  
bangsa yang mesti dihormati dan didengar suaranya  
oleh teraju kepimpinan dunia dan seluruh warga penghuninya


tanah leluhur ini adalah maruah bangsa yang ada di dalamnya  
kebenaranmu mengenalkan keperibadian kami ke serata benua  
adalah bayangan keperwiraan yang telah kau perjuangkan

doamu terhadap negara tercinta  
agar dirahmati Allah dan dianugerahkan  
nikmat kemuliaan berkekalan  
adalah bisikan kemuliaan hati nuranimu  
yang tak terbalas oleh kami  
bangsa yang berpayung di bawah kepimpinanmu  
penghormatan dan sanjungan tinggi masyarakat dunia  
telah kau sempurnakan untuk mengangkat maruah  
bangsa dan negara kami tercinta ini  
detik kemuliaanmu telah kau berikan seluruhnya untuk kami

sebentar lagi  
saat kau melambaikan tangan akan kau lakukan  
perjuanganmu masih belum selesai  
begitu pun kami mesti meneruskannya  
demi kebenaran dan kedaulatan yang telah kau pancangkan  
di peta sejarah bangsa manusia di dunia ini

sekali berjuang terus berjuang  
benih yang baik jatuh ke laut menjadi pulau  
seterusnya menjadi pandu arah perjalanan kapal  
meredah laut lepas  
benih itu adalah wajah kemurnian dan keberanianmu  
mengenalkan tanda harga kedaulatan bangsa dan negara  
menjadi pulau perhatian sejarah manusia abad ini

kamilah yang akan menjaga dan mengekalkan  
perjuanganmu seterusnya  
yakin boleh  
pasti boleh!



# Wajah Kebenaran

**BH 31/10/2003 - B3 PRECISE**

*Terima kasih*

*Dato' Seri Dr Mahathir Mohamad*